

1834 - Davart ils dretgs per l'aua da Londadusa (Ondadusa)

La dispeta ei succedida el 14avel tschentaner denter ils vischins da Camischolas Sura e Flurin Sura e Sut. La dertgira decida ch'era ils da Flurin Sura e Sut hagien dretg dall'aua che flessagia giu da Londadusa. Flurin Sura fuva in uclaun habitau. Denton, il pli essenzial ei la suandonta remarca el document: „en Flurin Sura vid il dutg u „fluss“ che cuora dadora la baselgia giu“. In mussament d'existenza d'ina baselgia, forsa plitost ina caplutta, a Flurin Sura.

Era Flurin Sut fuva habitau. Aunc entuorn 1900 fuvan plirs suloms da casas veseivels. L'existenza dils dus loghens numnai sco habitadis confirman medemamein documents da 1456 e 1555.

Il document consista en sesez ord quater differents documents. La pli veglia part dil document datescha digl onn 1368. Igl original da quel maunca e savess aschia esser il pli vegl document da nies archiv communal. La speronza ch'el vegni aunc zacu neunavon astg'ins buca piarder, existevan tenor la davosa remarca silmeins duas copias. Il secund document datescha digl onn 1517 ed ei atgnamein il document principal. Quei onn ei il cass staus avon dertgira e vegnius tractaus sin fundament dil document vegl da 1368.

Il proxim datum impurtont ei igl onn 1664. Quei onn ei il sura document vegnius confirmaus entras il sigil dil cumin dalla Cadi. In'ulteriura confirmaziun dalla scartira veglia da 1368 ei succedida igl onn 1834, medemamein cul sigil dalla Cadi.

La scartira „Davart ils dretgs per l'aua de Londadusa“ ei vegnida copiada da pader Baseli Berther, Muster/Dieni ils 28 da settember 1908 dad ina copia, che sesanflava en mauns da signur Vigeli Riedi da Zarcuns. Da quei temps fuva el possessur dalla acla a Flurin Sut.

Davart ils dretgs per l'aua da Londadusa, dil Dutg Grond, che duei flessegiar a Flurin Sut

Jeu mistral Durig Berchter da quei temps „Lantamann“ dalla Cadi confessel aviartamein e fetschel da saver a scadin cun questa brev, che sco sin oz, sco il datum da questa brev muossa, ein cumpari avon mei ad in aviarta dertgira, enten quei che jeu sesevel a dretg a **Mustér** enten la stiva gronda dalla dertgira, ils honoreivels Gion Berchter, salter da **Tujetsch** e Gion Martin Lianascha per sesez, e per sia ugadia cun lur messadurs Plaisch Bundi, concedius ad els cun dretg. Ei han plonschiu encunter Gielli Ortschei, Gion Janin, Gion Heyni e Gion Salya; Gion Berchter davart **Flurin Sura** e **Flurin Sut** e Gion Martin davart **Florin Sut**, qualmein els hagien menau sin lur funs l'aua che flessegi ord la **Val Londadusa**, dil qual ni els, ni lur vegnentsuenter hagien dretgs, ni vegnien mai a survignir dretgs suenter mussament d'ina brev da sentenza, la qualla ei stada mess'avon ad ina dertgira e garegiau, ch'ella duei vegnir legida. Sin quei ha garegiau il numnau derschader da star si e da metter in auter en siu stagl, pertgei che Gion Berchter fuss siu frar e plunschess davart quell'aua, dalla quala el havess era dretgs; ed ha tschentau a dretg: „cheu ei stau sentenziau, ch'aschinavon ch'el hagi era dretgs, numnadamein davart **Flurin Sura**, duei el haver stgisa da star si, ed en siu num duei Gion Wenzut da gliez temps salter da **Mustér** seser en sco derschader.

Sin quei garegia il numnau Gion Berchter puspei, che la brev vegni legida si, la quala suenter in „Umbfrag“ fatg da mei numnau derschader ei cun sentenza stada enconuschida da tedlar. Suenter quei han ils numnai garegiau tras lur messadur, ch'in derschader less truar ad els, che l'aua pudessi flessegiar e cuorer sco da vegl e suenter dir dalla sentenza, ni aber rispunder pertgei els veglien quei buca schar? Cheu ei stau avon dretg Gieli Ortschei e Gion Janin cun lur messadur Pedrut Jenet, da gliez temps „Banner-Meister“, manegiond che la brev fuss memia veglia e che duess purtar negin donn ad els, pertgei che ditg suenter quei seigi iu giu ina bova, ch'els hagien pitiu ton e pli grond donn ch'els, l'aua seigi era mai menada, ni duvrada autruisa, pertgei che avon temps seigi ei stau in frust prau d'in num **Florin-Sura** e **Camischolas Sura**; perquei manegien ei bein d'haver dretgs; perquei han ei s'offeriu, ed era garegiau da schar vegnir sin la uatga e sin quei han ei schau tschentar a dretg, sch'ei possien haver la uatga, ni tgei che dretg fussi, ed ei stau enconuschiu, ch'ei possien haver la uatga e dueien per quella gada haver rispundiu, resalvond sche la cunterpart vegness a tschuncar giu. Sin quei han ils avon numnai tras lur messadur replicau, che la fonatuna che surveschi a **Florin Sura** e **Sut**, seigi

lunsch plinengiu, che nua che la bova seigi rutt'ora e cun quei han era manegiau da metter giu l'uatga e da restar tier lur sentenza veglia, il qual ei buca daventau, sonder cun sentenza e schau enconuschiu, e schau tier l'uatga e schi baul sco ei seigi commoditad al numnau derschader ed obercheit ed el vegni a vegnir avisaus, ed era ch'ils numnai Gion Berchter hagian fatg „kundt“ e da saver alla cunterpart, che omisduas parts possien vegnir cun perdetgas e brevs, sco els manegien d'haver e sin quei, hai jeu numnau derschader tras lur avis clamau tut gl'obercheit da vegnir cun els sin l'uatga e leu sesi a dretg muort lur dumandar, e muort il dretg, ni giusta, e pi il mistral Durig Berchter ha priu stgisa, ed ei staus si e mess en siu stagl ed autoritad il numnau derschader Gion Wenzut; avon il qual ed ina entira dertgira ein cumpari cun lur messadurs ils avon numnai, ed han omisduas parts garegiau da mussar las stuschonzas, e nua la bova seigi rutt'ora, e nua l'aua neschi; cheu ei stau cun sentenza enconuschiu, ch'il plogn avon mussar, e leu suenter possi era la cunterpart mussar, in e l'aua part schiditg sco ei veglien cun tutta lur plena e buna satisfacziun. Sin quei sun jeu numnau derschader cun ils geraus ius si tier la fontauna nua ch'ella nescha, ed era mirau nua la bova seigi ida giu, e puspei suenter l'aua tochen giudem e suenter quei che scadina partida ha giu mussau suenter lur bienplascher e satisfacziun, lura sun jeu numnau derschader puspei sesius a dretg sur la strada denter **Flurin Sura** e **Flurin Sut**, nua che omisduas parts ein stadas en cuntradicziun manegiond scadina d'haver raschun; cheu han garegiau ils savens numnai Gion Berchter, mistral Durig e Gion Martin da tedlar las perdetgas, il qual la part cuntraria ha buca vuliu schar tier, aber la dertgira ha tedlau quellas. Suenter quei han omisduas parts tschentau a dretg. Sin quei ha jeu numnau derschader emprau entuorn per il sarament e suenter gl'„umbfrag“ ei stau sentenziau „einhellig“ (*unanimamein*), qualmein ei sesanfli cun perdetgas, che cura ch'ei crodi malauras, sche mondien ils numnai Gielli e Gion si ed endrezien l'aua anenviers en il dretg dutg, ed era ora enten il dutg pli giudem, che va per la plaunca da maun seniester cura ch'ins va ensi, leusi eis ei il fun da **Camischolas Sura**, ed han negin dretg tier l'aua, schi pauc sco ils dutgs dadora e tier quei laian ei esser etc. e la brev veglia (1368) laschein nus esser enten sia vertid e „Kraft“ la quala plaida aschia:

*A Tuts quels che vesan ni audan legian questa brev segiein nus cheu numnai, Peter vivens e Gion fargliuns, legitims fegls de Gion Padrutt da buna memoria, nativs da **Tujetsch** e vischins da **Camischolas Sura**, da saver e confessein aviartamein cun questa brev, ton per nus, sco per nos artavels vegnentsuenter qualmein nus havein giu dispeta cun ils honoreivels vischins da **Flurin Sut** e **Flurin Sura**, ils quals han funs en **Flurin Sura** vid il dutg u „fluss“ che cuora dadora la baselgia giu, davart l'aua che vegn giud la **Val da Londadusa**; cheu ei stau anflau cun verdad e cun engirau sarament, sco era cun aviert dretg e giusta a **Mustér** sut la glienda, che nus numnai frars, nos artavels, e nos vegnentsuenter, sche nus essan morts, haveien negins dretgs tier la avon numnada aua davart il funs che nus havein enten **Camischolas Sura**; tucond tier aber ils vischins da **Flurin Sut** e **Flurin Sura** ch'ei sesents oradem il vitg han cun dretga raschun avon tuts auters buns dretgs e negin auter sin tiara. Ei sesanfla era cun la sezza raschun a dretg, ch'ils numnai vischins da **Flurin Sut** dueien haver part da quella aua ton sco els han da basegns per lur casas e per lur biestgam, buca aber pli che lur basegns a buna fei, senza malard etc.*

*Nus numnai frars havein era scret quei cun lubientscha, cun saver, e veglia dil venerabel signur avat Johannes e digl giuncher Heinrich de Pontaningen, da gliez temps ugau dalla claustra da **Mustér**, e per ina ferma e perpetna segironza da tuttas quellas caussas, che stattan cheu screttas, havein nus cun tutta detschartadad rugau nies grazius signur avat Johannes, ed era il numnau ugau, il qual ei era sesius a dretg sut la glienda davart las numnadas caussas e pugn, ch'els omisduas pendessen aviartamein lur sigils vid questa brev. Che quei seigi tut daventau cun nossa veglia e saver e tras detschartameing rugar dils numnai treis frars, havein nus avat Johannes pendiu nies agen sigil aviartamein vid questa brev, la quala ei scretta a **Mustér** sin la vigelgia da s. Martin, gl'onn suenter la naschienscha da Niessegner tredischtschien e sisontotg (1368).*

*Da quei eran paretgas giuncher Christophel de **Rinkenber**, giuncher Ulrich de Pontaningen, Ulrich de Barlodt, da gliez temps mistral da Disentis, Gion Burgli Hügli da **Camischolas**, Rudolph de Rieffen, Heinrich de **Saliangen** ed auters honoreivels vischins dalla Casa da Diu biars e detgavunda etc.*

Da quella sentenza han ils numnai Gion Berchter, mistral Durig e Gion Martin dumandau ina testimonianza suenter il dretg, la quala suenter haver dumandau entuorn da mei derschader ei stada tras sentenza enconuschida da dar il sigil dil cumin etc. E per vera perdetga da tut quei ei confirmau e pendiu aviartamein il sigil da nies cumin vid questa brev, la quala ei dada ent' il meins da zercladur gl'onn suenter la naschienscha da Cristus nies car Segner 1517.

E schinavon che questa brev entras lieherlihedad ei buca stada observada, ed ida anavos, sche han omisduas parts, ed interessai cun cunsentiment e lubientscha d'in ludeivel obercheit da **Disentis** garegiau da mei Conradin de Medell, da gliez temps „Landschreiber“ da **Disentis**, ed era „Bunds-Schreiber“ dalla ludeivla Ligia Grischa, che jeu duei copiar e scriver giu danovamein; ed aschia confessel jeu numnau Landschreiber per miu sarament, che questa brev seigi scretta giu, e cunfrontada da plaid a plaid, cun il ver original u brev veglia, che haveva aunc si perfetgamein il sigil dil cumin e concordava en tut e pertut cun quest. Per perdetga da quei ha il ludeivel obercheit da **Disentis** tras rugar d'omisduas parts schau metter daniev si il sigil dil cumin vid questa brev gl'onn 1664, gl'emprem da zercladur.

Muster, ils 28 da november 1834.

Sin rugar da signur mistral Venzin Gion Chrest, da **Tujetsch**, vegn ei per enconuschienscha dil ludeivel obercheit, cun cunsentiment dils signurs geraus Gion Chrest Monn e Gion Andriu Berther da **Tujetsch**, attestau e certificau che la sura copia seigi da plaid en plaid conforma ad in'otra copia mess avon al ludeivel obercheit.

Peter Anton de Latour, sco buntsstatthalter

Las persunas el document

- Durig Berchter, staus mistral 1513 - 1519, 1522-1525, 1551 e „Landrechter“ (cau dalla Ligia Grischa) 1522/23, oriunds da **Tujetsch** e veva era dretgs a **Flurin Sura**.
- Gion Berchter, salter da **Tujetsch** 1517, frar dil sura mistral e „Landrechter“
- Gion Martin Lianascha
- Gion Bundi, messadur
- Gieli Ortschei, Gion Janin, Gion Heyni, Gion Salya, vischins da **Camischolas Sura**
- Jennet Pedrut, messadur e da gliez temps „Banner-Meister“
- Peter vivens e Gion, fargliuns da Gion Padrut, vischins da **Camischolas Sura**, nativs da **Tujetsch**
- Avat Johannes II, oriunds da **Glion**, avat suenter igl assassinat d'avat Jakod de Buchhorn igl onn 1367 entochen 1401. Suenter el suonda igl avat tujetschin Pieder de Putnengia (1402 - 1438).
- Giuncher Heinrich de Pontaningen da gliez temps, 1368 ugau dalla claustra da **Mustér**
- Giuncher Christophel de Rinckenberg
- Giuncher Ulrich de Pontaningen
- Ulrich de Barlodt (Barlotta), da gliez temps mistral dalla **Cadi**. En quei grau ei quei document pli che impurtonts per la historia dil cumin dalla **Cadi**. Tochen oz valeva sco emprem mistral dalla **Cadi** Dominus Petrus de **Cavorga** numnaus l'emprema gada 1371. Iso Müller menziunescha Ulrich Barlotta sco mistral igl onn 1390.
- Gion Burgli hügli, vischin da **Camischolas**
- Rudolph de Rieffen
- Heinrich de Saliangen
- Conradin de Medell, vischin da **Tujetsch**, derivonts d'ina nobla famiglia aristocrata, 1664 „Landschreiber“ dil cumin e „Bunds-Schreiber“ dalla Ligia Grischa 1678, igl onn digl assassinat da Clau Maissen, cauligia; frar dad avat Adalbert II de Medell (1655 - 1696)
- Gion Chrest Venzin, mistral 1834, oriunds da **Rueras**
- Gion Chrest Monn e Gion Andriu Berther, geraus da **Tujetsch** 1834
- Pieder Anton Latour, „buntsstatthalter“ 1834